



SEZOENSBOOK 2019-2020

Zate hermeniekes, prinsewagel en nog mie...



PLEZEER & SJARITEIT

Inhaajd

Veurwoord Bastiaan Klomp	2
'Verleef op Mestreech'	3
Govies / Sezoensopening	5
Jäög	6
Vereineginge	7
Oetrope en Machseuverdrach	8
Stadsprins Luc II	10
Kiekoet, Lunch Carnavalesque,	
Rijaloet lunch	12
Prinselek treffe	13
Annakèrk / Drapeauzegening / Zitterd	14
Nuie Prinsewagel	15
Eddy / Kachelpiepers	16
4 Weke laank op weeg	18
Wel of neet Vastelaovend	20
Sjaole en Zörgcentra	21
Vastelaovendsdaog	22
Maag iech kieke?	24
RTV-Mestreech / Ron taofel 174	25
Zate Hermeniekes	26
Trekkers / Sportief veur Sjariteit	28
Aovend vaan 't Spinsleech	29
Mooswiefpöpkes	30
Op zeuk nao nui Tempeleers	31
De Tempeleers	32
Börgermètwérkers	33
In Memoriam	34
Bedaank!	35

Leef Vastelaovendsvierders,



Mèt väöl plezeer, meh achteraof toch ouch met 'n dóbbel geveul, loere veer trök nao 't Vastelaovendssezoen 2019-2020.
Es Mestreechtenere zien veer e gruuts volk... en tot veer e gezond stökske chauvinisme kinne, zal veur mengein ouch gein verrassing zien. Tot dit jaor oet oonderzeuk bleek tot de Mestreechtenere same met de Bosschenere 't mies gruuts zien op hun cultuur vaan alle lui in gans Nederland dát is toch wel erg sjiek um te leze. Neet verwunderlek tot 't Vastelaovendsleedsje vaan 2020 daan ouch d'n titel droog 'Verleef op Mestreech'.

Én laote veer dat veural blieve, gruuts op eus cultuur op vrundsjap en eus tradities!

En ein vaan die tradities is netuurlek tot örges op 'ne, dèks frisse meh zonnege zoondag in jannewarie, gans Mestreech oettrèk um getuige te zien vaan 't memint boe-op bekind weurt wee de Vastelaovend veurgeit es Stadsprins vaan Groet Mestreech.

Dit jaor waor d'n oetverkorene niemes minder es Luc d'n Twiede (Van Lijf), kleinzoon vaan Math d'n lerste dee Mestreech moch veurgoon es 'Snieprins' in 1979. Mèt prachtege medaaljes die dit jaor 'n hommaasj waore aan de Zate Hermeniekes én aon 't Mooswief dat mèt häör soppegreun op de Merret steit, trok Stadsprins Luc

d'n Twiede met zien Prinses Jolien en hun döchterke Doris vaanoet Wieckerpoort, Mestreech in um same mèt 't volk te genete vaan 'nen oonvervalsde Mestreechter Vastelaovend.

Prachtege daog, welleswoer mèt hei en dao get confetti oet de loch, vierde de Mestreechtenere Vastelaovend...

De vastelaovendskis met de kleier stoont bij väöl hoeshawwes nog neet op zolder en de hieringe wao-re koelek euze görgel aof en toen woorte iers Braobant en denao Limbürg en gans Nederland verras door maotregele um 't vreiselek corona-virus onder de knee te kriege. Oondaanks tot 't euze vastelaovend van 2020 neet tot nauweleks beïnvlood heet, straolt 't wel (achteraof gezeen) aof op deen tied.

Es Tempeleers höbbe veer 'Plezeer & Sjariteit' es eus levesmotto en zoe höbbe veer de luikes die door de maotrelege, wieneg lui mie onder ouge mochte óf koste koume, mèt get plezeregs verras. 'n Gezèt mèt de naom 'Good Gemöts' mèt verhaole & sjoen memories woort samegesteld en oetgegeve. Dit höbbe veer es Tempeleers via o.a. de verzörgingshoezer vaan de stad laote verspreie um ouch die in 'ne lèstegen tied, zoe noe en daan e leechpuntsje te kinne beeje. Leef lui, hawt pin en blijf gezoond!

Naomes Stadvastelaovendsvereining
De Tempeleers,

**Bastiaan Klomp,
Prizzedent-Tempeleer**



de Vastelaovend kint beginne!



Midde in de nach 'Verleef op Mestreech'

Örges nao de zomer 2010 woort Ron Nieste wakker. Es-of 't häöm iemes ingaof had heer 'n melodie in de kop. D'n teks had heer al e bitsje in de kop. "Iech bin opgestande en höbt gaw ingezoonge op mienem tellefoon", zeet Ron. En zoe woort 'Verleef op Mestreech' vastelaovendsleedsje 2020 gebore. Ron had metein e good geveul debij. Allein: op meziek zette had heer gein ervaring mèt. Meh gelökkeg had heer neet lang daouveur Patrick Ummels getroffe, erkind sjrijver vaan vastelaovendsleedsjes. Patrick: "Iech waor eigelek metein enthousias. 't Leep lekker, bleef haange, waor volks." Zoe wie altied pak Patrick daan de blokfluit um te zien of 't ouch te speule is. "Vereiste veur e vastelaovendsleedsje: 'n hermenieke moot 't sumpel kinne speule", zeet Patrick.

Hiel väöl aonpassinge gaof 't neet. Hei en dao e wäöordsje um 't get soepeler te make. Ron en Patrick waore gaw veerdeeg. En vol vertrouwe. Ron: "Iech weet nog tot iech in oktober gebeld woord mèt de vraog of op 9 november e fieske gehawwe kós weure in 'mien' tenniskantien. Toen höb iech gezag: dat kin neet, daan staon iech in de finaal vaan 't vaste-

laovendsleedsje." 't Bleek 'ne veuroetzeende blik, al doorde dat Ron allemaal te lang. Patrick: "Heer heet miech wel tien kier gebeld um te vraoge of iech al get had gehuurd." 't Verlossend tellefeunsje van Huub Sour vaan de SMV woort daan ouch mèt gejuich oontvaange. Volgende stap waor de prizzentatie. De twie mote lache es ze dao-aon dinke. "Mario Verhoeven kaom aofsjeid numme vaan de Zès Kop (de zengers vaan 't leedsje)", zeet Patrick. "Veer hadde get hertsjes gemaak um 'Verleef op Mestreech' te promote, en veer hadde nog twie hertsjes-pakke. Allein nog gein lui um die aan te doen in de finaal. En wee stoont toen op 't podium: Mario mèt zien vrundin. Zie had häöm euvertuig nao e paar pëlskes bij zien 'aofsjeid, en ze voont 't sjitterend."

Nao 'n zësde plaots vaan de vakjury in de finaal waor 't optimisme e bitsje getemperd. Meh neet väöl, zeet Ron gaw. "Veer zaoge de reactie vaan 't publiek, dat gaof metein e super geveul!" Parick: "Hiel belaankriek bij e leedsje. Este de reactie vaan de zaol zuus, wètste miestal al hiel väöl. En zeker wie veer d'n twiede kier 'Verleef op Mestreech'

hadde gezoonge, wis iech eigelek genog." En daan te bedinke tot de euverwinning nog ruimer had kinne zien. Zoewel Patrick es Ron hadde nog stumbiljëtte in hun tes, oontdèkde zie achteraof. "Veer góngé eine drinke op de euverwinning, en toen oontdèkde veer eus eige stumme nog in eus achtertes. Gans vergete in te lievere."

Veur Patrick waor 't neet de ierste euverwinning, veur Ron wel. "'t Is ech oongeluifelek um euveral die leedsje te hure", zeet Ron. "En daan zeker de bezunder versies op de kerreljong, op d'n ölger vaan de kerk, door de Philharmonie. Geweldeg." Patrick knik instummend. "Dat blijf bezunder, ouch este al dèkser gewonne höbs." Ze genote alletwie vaan alle optrejjes. Ron: "Veer hadde mèt Luc II ouch 'ne geweldegen hoeglöstegeheid. Eder optrejje boe veer same waore, waor 't fies en groete lol." Dat smaak nao mie, veur zoewel Ron es ouch weer veur Patrick. Wie 't vastelaovendssezoen geit oetziën wèt nog geine, meh e leedsje zal d'r koume es 't nudeg is. Ron: "Veer höbbe in eder geval eint veerdeeg. Weer 'ne kreet boe Mestreech verleef op kin weure!"





Veer zien de gobies vaan Mestreech

Al 15 jaor zörge zie tot de Vastelao-ovend ordentelek verlop: de twie gobies, de dames mèt hunne groete knievel die veur d'n optoch oet loupe. Veur de iewegheid mage zie ziech "Vastelaoendsvierder 2019" neume en zie trejje touw tot de Momuskanonneers.

Sjèr en Sjuul zien vrouwlui van mid-delbare leeftied, zelf Vastelao-ovend vaan keendsaof mètgekrege, meh mèt manne die ech neet vaan Vastelao-ovend hawwe. Al vieftein jaor trèkke zie mèt hunnen twieje drop oet um echte 'aw kloete' te make. Ze steke hun groete kókkel in al wat te doen is veur 't blauw op straat. Ze woorte ouch metein opgenome

door de 'echte' collega's en móchte mèt in de ME-bös en op 't bureau friet mèt sajs etc!

Allewel hun creatie bekind is in gans de stad, wèt geine wee achter die knievele zit. Zelfs noe ze Vastelao-ovendsvierder vaan 't jaor zien, blijf 't e groet geheim. "Veer wèlle allein mer plezeer make!" "Veer drinke allebei geinen dröppel alcohol en ammesere us köstekel mèt ederein; zoewel lui die veer kinne (en die us neet trökkinne), es mèt lui die veer neet kinne! Sommege bezokke veer al vieftein jaor laank en die breke ziech al jaore de kop dreuver wee veer toch zien."

"t Geveul wie v'r hoorte tot v'r



Vastelao-ovendsvierder 2019 waore gewore, waor hiemels! V'r woorte mèt e smoesje nao 't hoes vaan de sirremoniemeister, Remy, gelok. Ziene sidekick, Jan Janssen, waor e gans verhaol oet de deuk aon't doen tot v'r get speciaols móchte doen bij 't insjete. 't Waor get vreemp en neet ech get boe veer werm veur lepe, meh jeh, de wèls de Tempeleers nik weigere... Oongeluifelek wie 't Jan is gelök us zoe-ein in te sjödde." "En wie v'r daan ech op 't bordes stoonte um in te sjete, SJEVRAOJE!"

Tempeleers starte carnavalssezoen mèt ech Mestreechs fieske

Stadscarnevalsvereining de Tempeleers opent 't Vastelao-ovendssezoen 2019/2020 op zondag 17 november in de Rebelle aan de Kesselskade mèt 'n ech Mestreechs fieske. Onder de nummer 'Start vaan 't vijfde sezoen' is in de veurmaolegen 'Awwe Stiene' e fies veur joonk en aajd. 'Geluusterd nao vierders'

Oetbelder Odin Wijnhoven: "Veurlaagonde jaore begóste veer 't sezoen mèt eus openbaar jaorvergadering. De lèste kiere mèrkde v'r tot de publieke belangstelling veur dizzen avond aofnaom. V'r höbbe eus oere te luustere gelag bij de carnavalsvierders. Naotot ouch D'n 11devaand'n-11de oet de stad weggóng, kloonk ouch onder Mestreechse carneva-

liste ummertouw mie de roop veur 'n eige fieske veur 't gans hoeshawwe en alle carnavalsvierders. Me wèlt ziech treffe en 't carnavalsgeveul aonwakkere, zoetot dat mèt die drei daog, in fibberwarie 'n apotheos bereik".

Artieste, quiz, trökblik en Vastelao-ovendsvierder(s) 2019

Beppie Kraft, Duo X-elle, Ziesjoem, Marvin Rosier, de winners vaan 't Mestreechs Vastelao-ovendleedsje, Zate Hermenie De Batjakkers en netuurlek 't Garderizzjemint De Kachelpiepers. De Tempeleers höbbe gekoze veur 'ne gevarieerde middag boe 'n ganse struip aan Mestreechse artieste en gezèlsjappe optrejt. "Ouch loere v'r nog 'ns trök op Vaste-

laovend 2019, weure aajd-stadsprins Armand en zien prinses Kim nog 'ns in 't zönneke gezat en weurt veuroet-geloerd nao carnaval 2020.

Um de kinnes vaan de Vastelao-ovendsvierders te teste (of op peil te kriege) is 'ne Vastelao-ovendsquiz. Ein vaan de huugdepunte vaan de middag is 't bekindmake vaan de 'Vastelao-ovendsvierder(s)' vaan 't jaor 2019, De Govies. Ouch is e speciaol heukske ingeriech boe kinder kinne speule en ziech kinne laote schminke", zeet Wijnhoven.

De prizzentatie vaan de middag is in han vaan sirremoniemeester Remy Rousseau.





Jääög



Vereineginge



Oetrope & machseuwerdrach





Leef Mestreechtemere,

Es de lui miech noe vraoge wie 't waor um Stadsprins vaan groet Mestreech te zien, daan staon iech meistens mèt miene moond vol tan. Boe beginste euver te vertèlle? Dao zien jummers zoevööl mominte gewees die veur altied in mien herinnering zalle blieve. Meh wat gief mie prinsejaor noe good weer?

Iech num uuch gere mèt nao e bezeukske boevaan iech eigelek nikс verwachde. Veer góংge mèt de ploog vaan de Tempeleers op stap en op e gegeve momint kaome veer aan in Malberg. Dao stoont e bezeukske gepland aan de kienaoend vaan de Mallebergers. Ein vaan de vereineginge door de ganse stad die allemaol aktiviteite organiseert veur de bewoners vaan de versjèllende buurte.

't Waor 'ne gezèllegen oonderein vaan joonk en aajd en de zaol zaot knatsjvol! Zelfs op de buun zaote grupkes lui die allemaol "KIEN" wouwe rope. Euveral boe nog get plaots waor stoonte de kedo's veerdege veur de gelöksveugel. Bezunder gruuts waor iech tot iech nog e paar nòmmerkes moch aofrope en daomèt lui in de prijs kós laote valle.

Op 't ind vaan d'n aovend höb iech laote wete tot iech kouwend jaor weer zouw koume en daan gezèlleg mèt kom kiene. Hei is door de drökde wijer neet mie door iech bij stèlgestande, meh mèt de boonte störm (dee gelökkeg door kós goon oondaanks de störm!) kaome de Mallebergers langs mèt 'n attentie en daobij 'n entreebewies veur de kienaoend in 2021! Iech höb miech te barste gelache, want dit is veur miech noe gans wat de Vastelaovend inhèlt en steit veur miech perceis veur sjari-teit en plezeer!

Tijdens mie prinssjap höb iech allemaol vaan dit soort mominte mage mètmake. Vaan e bezeuk aan 'n ech Vastelaovendsfies tot e bezeuk aan 't hospitaol. Euveral waor me blij um de Stadsprins te oontvaange. Wat wèlt 'ne Mestreechter jong noe nog mie?

Veur miech waor 't ouch oongeluifelek um te zien wat alle vereineginge organisere um de lui te ammesere of 'n hart onder de reem te steke. Mèt naome de Tempeleers höbbe miech heimèt verras. Wat dao neet allemaol gedoon weurt veur de Vastelaovend en de Hoegen Hoeglöstegheid! De zous bekans vergete tot de vereineging bestoet oet allemaol vrijwèllegers.

Leef Vastelaovendsvrun,

Tot iech uuch bin veur mage goon mèt de Vastelaovend maak miech bezunder gruuts en iech zal dit mie leve laank blieve oetdrage. Same mèt mien prinses en eus dochter stoont iech op de Merret wie iech woort oetgerope, meh de weke denao höbbe veer es echte Vastelaovendsfamilie 'ne prachtegen tied beleef. 'nen Tied um noets mie te vergete!

De pandemie boe veer allemaol door getroffe zien, heet miech nog mie doen beseffe tot 't allemaol neet vaanzelf kump en nikс vaanzelfsprekend is. Veer loere allemaol oet nao 't momint tot veer de Mestreechter Vastelaovend weer same kinne goon viere! Tot deen tied höb iech fantastische herinneringe um op trök te loere en dao wèl iech alle Vastelaovendsvierders in Mestreech veur bedaanke!

'ne Groete merci!

Luc II





Kiekoet, lunch carnavalesque & rijaloetlunch





Prinselek trette in Mestreech

Op 29 jannewarie had iech 'n zakeleke aofspraak in Vinlo mèt Marcel Verdellen.

Obbins deeg heer de deur touw en zag: "Théon iech moot diech get vertèlle". Heer kaom nao miech touw en leet miech 'n foto zien. Nao 't zien vaan dees foto mèt 3 veur Vinlo karakteristieke mötse vaan de Vastelaovendsprins en zien 2 adjudante, wis iech wie laat 't waor.

Mien ierste reactie waor: "t Is neet woer!!!!"

Meh dat waor 't dus wel.

Hiel gruuts waor Marcel tot ze häöm hadde gevraog um Vinlo veur te goon mèt Vastelaovend 2020. Same kaome veer toen op 't idee um te loere of veer, De Tempeleers Mestreech en Jocus Vinlo, us in 't Vas-

telaovendssezoen örges kóste treffe. Oetindelek höbbe veer, strik geheim, 'nen daotum geprik tot Prins Marcel, zien 2 adjudante en 'n diligatie vaan de Jocus nao Mestreech zouwe koume.

Veer höbbe 't bezeuk vaan de diligatie vaan Vinlo besproke mèt eus besjèrmvrouw Annemarie Penn, borgemeisterse vaan Mestreech, die spontaan aongaof us allemaol, nao de lunch, oet te nudege veur 'n bijeinkoms op 't stadhoe. Dit kaom ouch de borgemeester vaan Vinlo ter oere dee geliek wouw aonslete bij 't treffe.

Op maondag 17 fibberwarie waor 't daan eindelek zoe wied. Stadprins Luc II heet prins Marcel van harte welkom geheite in restaurant Onglet in Wieck. Dao höbbe veer

genote vaan 'ne veurtreffeke lunch. Ouch L1 en de sjrievende peers waor vaan 't treffe op de huugde gestèld en 's-aovends waor 'n speciaol oetzending te zien op d'n tv.

Nao de lunch zien veer allemaol same nao 't stadhoe gegaange boe eus besjèrmvrouwe us nog heet getracteerd op koffie en vlaoj. Nao euver en weer nog get getoek te höbbe gaove de borgemeester vaan Vinlo en de vors vaan Jocus aon us gere te wèlle invitere um 't volgend Vastelaovendssezoen nao Vinlo te koume.

Wee wèt waor dit de start vaan 'n nui traditie!

– Théon Kennis, habsjaar



Drapeauzegening, Annakèrk & Optoch Kommittee Zitterd






**Es v'r bij Victor Salentijn zitte, is
heer zjus veerdege mèt 'n flinke
rinnevatie vaan zienen hoof. Nui
tuinhuiske, gievel gewit, stein ver-
vaange. Victor heet neet stèlgeze-
te. Meh heer hèlt ouch wel vaan
klusse. Daorum ouch tot heer mèt
väöl plezeer trökloert op 't bouwe
vaan de nuie Prinsewagel.**

D'n hoof aonpakke waor gemeke-leker, want vaan d'n awwe wagel (daterend oet 1998) waor gein tei-kening of niks. En toch mós dee ver-vaange, zeet Victor. "Heer waor neet mie veileg, en had gein kinteikeplaat, dus veer mochte neet demèt in 't verkier." Meh boe beginste, este 'ne nuie wagel wèls make? Beter good geklawd es slech bedach: bij de Marotte in Zitterd. Victor: "Iech kós dao eine, en veer zien toen ins mèt e paar maan goon loere. De Marotte laote d'n optoch doen door 'n optochkemissie, en die höbbe e stöf of 8 prinsewagele veerdege stoon. Eder jaor make ze 'ne nuie veur hunnen eige prins, de res weurt verheurd." Umtot de Tempeleers gaw'ne wagel nudeg hadde veur 't sezoen 2019, woort veur dat jaor eine geheurd vaan de Marotte. Prins Armand I

stoont op dee wagel. "Sjoen dink", zeet Victor. "Meh wel prijzeg um te heure. Dus zien veer dat jaor aan 'ne nuie begós." Umtot 't greun leech veur de bouw pas in septemer kaom, waor dat flink aonpeze. "Zoonder teikeninge en zoonder kinnes vaan d'n awwe wagel zien v'r begós. Pol Feron, Pierre Dassen en iech höbbe toen toch mer hölp gevraog vaan de Marotte. Want boe beginste hè?" 'n Oontwerp vaan Famke Rousseau en Wendy Wasbauer mèt allemaol prinsekappe woort vervierdeg tot 'n maquèt. "Zoe hadde veer 'n idee", zeet Victor. Vaan idee nao oontwerp, waor 'ne flinke stap. Weke achterein waor 't iezer buige, lasse, kukegaas aonbringe, um te zörge veur stabili-teit en es lèste de aonkleiing. Victor: "Dao höbbe get ore in gezete jao. Loer, veural de deile boe lui stoon mote steveg en stabiel zien, de res moot veural liech zien. Dat waor eve zeuke, en veural werk boe väöl hennekes bij nudeg waore. Gelök-keg höbbe väöl lui geholpe. Dat mós ouch wel, want vastelaovendszon-dag mós de wagel veerdege zien." Gelökkeg kaom de wagel oet 't maggezijn vaan Viamij op de Caber-gerweeg, boe de wérkplaots waor.

"Zalste altied zien, meh gelökkeg hadde veer dao-aon gedach." Meh wie 't moment suprème dao waor: wind. Hiel väöl wind. Störm zelfs. En dus mochte gein wagele mèt in de Boonte Störm. Toen höbbe e paar maan wel eve stèllekes gevlook, zeet Victor lachentere. "Meh good, gelökkeg hadde veer 'n herkansing bij de Kinderoptoch. Toen heet Mestreech kinnes kinne make mèt de nuie wagel." Wat opveel waor de flexibiliteit veur hoeglöstegeheid Luc II en zien Tempeleers. Boe d'n awwe wagel redelek statisch waor mèt e paar staonplaatse, kinsté op de nuie wagel alle kante op. "Dat waor ouch de bedoeling", zeet Victor. "D'n Hoeglöstegeheid moet tösse de lui kinne koume, en de Tempeleers ouch. Dat kin. Este dee wagel örges neerzèts, höbste gei podium nudeg." De wagel weurt noe veerdege gemaak veur e nui sezoen, wie dat ouch maag koume oet te zien. D'r weurt nog verleechting aongebrach, en me kint get mèt confettikenonne koumend jaor, zeet Victor. "De wagel moot mie sfeer geve, beleving. Dao weurt noe aan gewèrk. Laote veer hope tot Mestreech dao gaw vaan kint genete."

Nuie Prinsewagel



4x 11 jaor: Aofsjeid vaan



Obbins stoonte ze dao, achter Eddy Roijakkers. Alle Kachelpiepers mèt e wit smörfemötske op. En Eddy had zelf de roej möts vaan Groete Smörf opgezat gekrege. 't Smörfeleed kloonk euver de Vriethof, en dat metein nao de kinderoptoch. 'n Humoristische hommaasj veur de aofsjeid nummende tambour-maitre.

Eddy moet nog lache es heer aan afgeloupe vastelaovendsmaondag trökdink. "Iech had nik s in de gate. Obbins woort miene kolbak aofgezat en kraog iech get op de kop gezat. Iech moch allein mer veur miech oet loere. Wie iech 't sein gaof um te goon loupe, kloonk 't Smörfeleed. Iech dach nog: wat is dat veur e leedsje. Toen höb iech mer ins achter miech geloerd. Geweldeg momint!" Groete Smörf sloog op de baard dee Eddy had laote greuje. "Iech bin 44 jaor geleie bij de Kachelpiepers begós mèt baard, en iech stop mèt baard."

E momint dat veur Eddy ouch de sfeer binne de Kachelpiepers teikent op dit momint. "t Pak ziech allemaal good. Zeker zien veer neet allemaal vrun, meh dat hoof ouch neet. Meh zoe gaw veer oettrèkke, zien veer ein korps. Vreigele doen veer wel bij eus rippetties. Dat huurt debij, zjus zoe good wie e glaas beer drinken weer alles opgelos is. Want dat is gelökkeg altied 't geval!" En dat is al ins aanders gewees, rappeleert Eddy ziech. Neet tot heer dao nog väöl euver kwiet wèlt. "Meh in die 44 jaor tot iech debij bin gewees, höbbe veer ouch al ins tije mèt hiel wieng leie mètgemaak, en hei en

'Groete Smör'

dao is ouch wel ins 'n klein rivvelutie gewees. Meh good, dat is gewees. Noe steit d'r e prachkorps. Dat huur iech euveral: d'r kump ech get aan es veer oettrèkke."

Zelf heet Eddy dat neet in de gate. Es tambour-maître llop heer veur 't korps oet. "Daan zuuste neet wie imposant dat is, al moot iech zègke tot iech altied wel oonder d'n indrok bin vaan euze meziek. Dat koper, dat bringk get. Vreuger zag iech altied: veer zien 't sjiekste korps, meh slech qua meziek. Allewyl zien veer nog altied 't sjiekste korps, en hure veer qua meziek ouch bij d'n tòp. Veer höbbe ech veuroetgaangk gebook." Nao 44 jaor mote de Kachelpiepers 't venaof kouwend sezoen doen zoonder de karakteristike kop vaan Eddy, mèt de al eve karakteristike kolbak. Heer vint 't sjoen gewees. "Iech höb bij mien 33-jaoreg zjubelei gezag: die 44 jaor wèl iech hole. Iech bin d'n ierste dee 44 jaor bij de Kachelpiepers is, en dat nump miech noets mie einen aof. Meh iech wouw 't besluut um te stoppe zelf numme. Iech wouw ech veurkoume tot 't bestuur op e zeker momint zouw zègke: 'Eddy, 't is sjoen gewees zoe.' 't Is sjoen gewees, meh dat bepaol iech noe wel zelf. Iech höb 'ne prachtied gehad!"

Vaanaof noe zal Eddy dus venaof de zijkant loere wie 'zien' korps in vol ornaat kump aonmarchere. "Dat zal wel 'n hiel bezunder momint weure jao. Bij mien aofsjeid höb iech 't neet druug gehawwe, en d'n ierste kier tot iech de Kachelpiepers op straat zeen, weurt zeker wete ouch e sje-vraojemomint!"



4 weke laank op weeg





Wel of neet Vastelaovend

In de loup vaan de twiedoezendjaorege historie vaan de Mestreechter Vastelaovend is 't dèkser veurgekoume tot Vastelaovend noedgedwónge op e lieg pitsje stoont of gaaroet neet gevierz kós of moch weure. Dat waor o.a. 't geval bij belegringe vaan de stad of es de stad door de vijand bezèt waor. Ouch bij hoongersnoed en de pes, die de bevolking vaan stad en dörp soms decimeerde, bestoont wieneg of geinen animo um Vastelaovend te viere. Ouch noe pits de vraog obben-uits "maske op of maske aof?".

Twiede wereldoorlog.

Wie hei bove al gezag gebäörde dèks dinger in de historie boedoor Vastelaovend in e bepaold jaor of soms nog langer, neet gevierz kós of moch weure. Dat waor in de veurege ieuw o.a. 't geval tijdens d'n twiede wereldoorlog wie georganiseerd plezeer verbooje waor. Dus al hiel zeker geine Vastelaovend. In de kaffees moch mèt die daog's aovends meziek zien, meh neet te laat umtot nao twelf oor ziech nien mand mie op straat moch vertuine. Nao de komst van de Amerikaanse bevrijders in september 1944 waor mer wienege animo um groets carnaval te viere. Noord-Nederland waor nog ummer bezat (hoongerwinter) en hei waor nog bekans alles op de bon en de kezjem koelek genóg um vaan te leve. Wie in mei 1945 gans Nederland bevrijd waor begós eus land ziech mèt stökskes en bitsjes bijein te

sjare. In Mestreech woorte de Tempeleers opgeriech en 't ierste carnavalsleedsje "Carnaval in Mestreech" vaan Math Niël oet volle boors gezoonge.

Waterstersnoed vaan 1953

Vaanaof 1946 góng 't us eder jaor e bitteke beter. Tot de nach vaan 31 jannewarie 1953 wie door 'ne twoere störm de dieke 't begaove boedoer op sommege plaatse 't ziewater meters hoeg stoont en hiel väöl lui verdronke. Deze ramp, zoe vlak veur Vastelaovend, sloog in wie 'n bom. Bij zoeväöl leid en noed waor gein plaots veur Vastelaovendsplezeer. Neet veur Mestreech en neet veur Frans Pieters, dee zie prinsepekske al veerdeg had ligke, en dee vaanaof toen es d'n "oongekroonde" door 't leve is gegaange.

De Golfoorlog

Nao de watersnoedramp bleef 't gelökke jaore röstig tot 't momint boe-op de naoderende Golfoorlog ziech aonkondegde. Irak zouw door Amerika tot de orde weure gerope, en Irak op zien beurt blufde tot wat hun betröf dit de "moeder aller veldslagen" zouw weure.

In 't leech vaan dees dreiging woort de hölp vaan St. Servaas ingerope en trok me, gans in lijn vaan 'n ieuwe-aw traditie, op 'nen aovend beientere mèt de Noedkis door de straote vaan Mestreech. In deze beiweeg leep och Stadsprins Rob d'n lerste dee ziech, zjus wie hiel väöl aander lui, zal höbbe

aofgevraog: wat beteikent dit veur de Mestreechter Vastelaovend?


Börgemeester Philip Houben leet de Tempeleers wete tot de gemeinte, gelèt op de benkeleken towstand, deze kier neet zouw mètwérke aan de georganiseerde Vastelaovend. Dat beteikende gein vergönninge, gein hand- en spandeenste en geinen oontvangs vaan de prins in 't stadhoes. Gein direk verbod meh wel 'n duidelek signaal vaan de euverheid riechting Tempeleers.

Veur de Tempeleers woort 't op eier loupe. Wat kin wel en wat kin neet. In de geis vaan -Vastelaovend es ludieke anarchie vaan 't volk- woort me links en rechs alderlei initiatieve vaanoet de börgerij gewaar. Zoe trok op zoondagmiddag 'ne boonte störm door de straote vaan Mestreech. Zoonder Tempeleers en zoonder Prins. Dee moch "bekans oonopgemèrk" vaanaof e balkunneke in de Groete Staat kieke wie 't volk vaan Mestreech Vastelaovend vierde.

't Spook Corona

Obbenuits weurt Mestreech geconfronteerd mèt de benkeleke vraog: wat kin straks wel en wat kin straks neet mèt Vastelaovend 2021. Wee in de glaze bol kin kieke maag 't zègke!

– Tempeleer Bert Beenkens





Sjaole & Zörgcentra



Vastelaovendsdaog





Maag iech kieke?

**Alle jaore laank weurt in de weke
veur de drei daag oetgebreid
verslaag gedoon vaan alle Hoeg-
lösteghede vaan de SMV-verei-
neginge door de vrijwèllegers**

**Ouch de Zate Hermeniekes kou-
me aon 't woord. e Koppel dat
zörg veur al die hermeniebeelde,
al e jaor of èlf, is Hans en Yvette
Wijnands-Huveneers.**

11 jaor geleie waore Hans en Yvette alletwie allein nao 't euverleie vaan hun partners. Gans modern toen al, zatte zie de ierste stepkes op 't gebeed vaan Internet-dating. En dao sloog de voonk euver!

Hans is al vaanaof 't begin ein vaan de zier gewaardeerde vrijwèllegers vaan TV-Mestreech. 't Vrijwèllegers-program, iers nog Kómpenei, noe Vitrien, is bekend vaan 't meziekske "Maag iech kieke?" vaan Ben Pachen. Al 20 jaor zèt Hans ziech dao

in es cameramaan en editor. Wie heer e koppel vörmdé mèt Yvette, woort zie al gaw mètgenome nao de 'preview'-aovende en dao maakde de res vaan de vrijwèllegersfamilie kinnes mèt 'n leuke vrouw die ouch al gaw dat TV-virus in 't blood had zitte! Same höbbe zie al tösse de 700 en 800 items gesjote veur euze lokale zender. Ouch make ze mèt hun eige productie-maotsjappijke Studio35 fèlmkes.

Op e geve momint kaom 't idee op um mèt Vastelaovend ouch al beeldé te sjete. Altied hendeg es 'inserts' veur 't volgend jaor. Dat pakde good oet. Al jaore trèkke Hans en Yvette door Mestreech, gewaopend mèt hun opnaome-apperatuur achter de Zate Hermeniekes aon. 't Jaor drop goon ze daan 'n interviewke opnumme mèt de lui achter zoe'n hermenieke. Oondertösse höbbe ze al e fèlmke of 50 op die meneer gemaak! Zoe lierde ze netuurlek ouch 'nen

houp lui kinne. Guido Oomen van de Bok z'n kloete kraoge ze zelfs zoe wied um mèt te speule in 'Decor Wiek' es zwerver! Guido späölde die rol zoe euvertuigend tot lui die langs lepe zagte: "Loer deen erme maan op die baank ligke, dat zouw toch neet mie mote kinne!" Yvette en Hans móste de lui euvertuige tot 't toch veur fèlm-opnaomes waor en tot Guido denao gewoen weer veileg nao zien hoes in 't Vrouweveld kós goon!



RTV Mestreech



Ron taofel 174



Zate hermeniekesconcours

Es Hoeglöstegeheid Armand I vaan 2019 had Armand Peereboom al zoeget vaan 'dat zate hermeniekesconcours, dat kin aanders.' "Es stadsprins steiste oppe Vriethof en al die hermeniekes trèkke langs. Allemaol vrij statisch en de lui in de stad kriege neet al tevæöl devaan mèt. En dat oonderwyl eus hermeniekes ein vaan de aankers vaan de vastelaovend zien!" Börgemeister Penn-te Strake gaof häöm e lèste zètsje. "Zie gaof bij eus kinnesmaking aon tot ze hoopde tot de hermeniekes weer 'n veurnaomer rol in de vastelaovend zouwe kriege." En dus góng Armand aon de slaag mèt 'ne nuie opzat vaan vastelavendsdinsdag, door häöm al gaw 'D'n daag van de zate hermenie' geduiip. Mèt respek veur alles wat in 't verleie opgezat waor, loerde Armand same mèt de Tempeleers nao 'n nui invölling. Mier aondach, beter verspreid euver de stad en mie hermeniekes-sfeer.

Same kaome ze oet op e paar nui illeminte: e gezamelek oontbijt op Slevrouweplein, 't oetrope vaan 't zaat hermenieke vaan verdeenste en 'n gezameleke aofsletting oppe Vriethof. 't Hermeniekesconcours verdeilde ze euver vief podia in de stad, mèt d'n Hoeglöstegeheid nog altied in zien rol es hoofrolspeuler aon wee de hermenies laote zien wat ze kinne. Mèt zien oondertösse bekind enthousiasme kraog Armand ederein mèt: Tempeleers, hermeniekes, horeca en gemeente. Oonder e straolend zönneke

maakde Mestreech kinnes mèt 'Dn daag vaan de zate hermenie'. Nao 't oetrope vaan 'De Zate Hermenie', ouch wel 'De Aw', tot hermenieke vaan verdeenste, trokke de gróppé muzikante veur 'n oontbijt nao Slevrouweplein, of nao hun vaste horecazaak es ze dao aofspraak mèt hadde. Bij de podia in de stad verzamelde ziech de ierste lui, en wat volgde waor 'ne boonte reijaloet vaan meziek en sfeer.

De aofsletting oppe Vriethof waor get te drök en te hectisch, onder andere door de aanwezigheid vaan André Rieu dee same mèt de börgemeester en de gouverneur de hermeniekes dirizjeerde, meh al mèt al waor d'n ierste kier e succes. Vint ouch Armand, e dik haaf jaor later. "Jao, iech höb hiel väöl positief reacties gekrege. Op d'n daag zelf al, meh ouch bij de versjèllen-de evaluaties." En zoe wie dat altied is bij evaluaties: liermominte gief 't ouch. "Zakes die us ouch al waore opgevalle, en daan höbste 't mèt naome euver de aofsletting. Die góng neet good, ouch umtot op de naom Rieu mie lui en media aof-kaome es veer verwach hadde." Dat weurt dus aanders koumend jaor, zeet Armand. Es daan get georganiseerd maag weure, hèt dat. "Niks is nog zeker, meh wat miech betròf zètte veer dit door. Dat waor zowiezoe de aofspraak, meh v'r wete nog neet wat kin door corona. Meh es 't kin, daan goon veer hei mèt weier. D'r ligk 'ne gooje basis um op door te pakke."





Winner 'ode aan de zate hermeniekes'

De Tempeleers en Veldeke Krink Mestreech höbbe dit jaor veur d'n twiede kier 'ne sjriefwedstrijd georganiseerd. Nao de "ode aan 't Mooswief" vaan verleie jaor woort me dit jaor oetgedaaum de leefde veur de zate hermeniekes te besjrieve in diechvörm. Mie es 30 lui voolte ziech geïnspireerd um e gediech euver dit stökske Vastelao-vendstraditie te sjrieve.

De jury, bestaonde oet Veldeke Mestreech veurzitter Hortense Brounts, de winner vaan verleie jaor Will Wintjens en aajd-Stadsprins Armand Peereboom, had de zwoer taak alle gediechte te beoerdeile en hei 'ne winner oet te keze. Dat is oetindelek gelök. Met väöl plezeer maak de jury bekind tot winner oet te rope:

Vivianne Rijnders

Mèt häör gediech wis zie de leefde die edere Vastelao-vendvierder veult veur de zate hermeniekes perfek te besjrieve. Vivian, perficia!

HERMENIEKES-KLAANKE KLINKE
WERVELE ROOND
DWARRELE NEER
OP 'T VASTELAOVENDVIEREND VOLK
'T RITME VAAN REMMELKES
RAMMLEZJANG EN ZJIEM
'N SJUIF, DE DIKKE BOMBARDON
BLINKENDE TROMPÖTTE
'T VEENDEL VOL MEDAAJES
WEJJEND IN DE WIND
D'N TAMBOUR-MAÎTRE
GRUUTS VEUROP
IN DE MAOT OF NEET
EUS HERMENIEKES
SJITTERE EN SJJINE
SJJINKE US MESTREECHTER GEIS
BETOUVERE DE STAD
GEVE SJEVRAOJE
MAKE VEURJAOR
IN DE WINTER



D'n tóp 5 weurt compleet gemaak door:

1. Vivianne Rijnders
2. Annalies Cabo
3. Dennis Ummels
4. Stefan Gybels
5. Hubertine Haaken

V'r wèlle alle aander deilnummers bedaanke veur hun creativiteit en inspirerende wäörd. Geer höb laote zien tot de zate hermeniekes én de Mestreechter taol uuch aon 't hart ligke.



Trekkers



Sportief veur sjariteit



Aovend vaan 't sp̄insleech

Op zaoterdag 11 jannewarie is 't zoewied. Daan geit de kansellerijraod op zeuk, in 't sjijnsel vaan 't sp̄insleech, nao dee Mestreechter jong dee mèt belump en vaste hand de vastelaovend in eus Mestreech kin veurgoon.

Veer beginne deen aovend, um 19.30 oor, bij de beeltenis vaan dee Mestreechter Geis.

Veurtot 't officieel program begint weure iers de zjubilarisse vaan de Kachelpiepers in 't zonneke gezat. Dat zien dit jaor Eddy Roijakkers (4x11jaor!! Uniek) lid, Jo Cobben (11 jaor lid) en zien dochter Nadine Cobben (2 x 11 jaor lid). Eddy Roijakkers oontvingk daouveur de allerierste en nuiste zjubilarisse medaaje veur 11 jaor. De naom en oontwerp van dees medaaje weurt dao bekindgemaak. Jo Cobben en Nadine Cobben oontvaange de 'Mestreechter Geis op spang'.

Nao de Geis gevraog te höbbe veur in-, euver-, aon- en oetziech en nao 't speule c.q. zinge vaan 't Mestreechs volksleed en 't clubleed vaan de aajd-stadsprinse (Pie Heunders en zien lekker weurs) goon veer op weeg.

"Veer" dat zien: de vief manslui vaan de kansellerijraod vaan de Tempeleers, 'n aontal Aajd Stadsprinse



(functioneel en neet functioneel), väöl losloupende Tempeleers, 't Garderizzjemint de Kachelpiepers, get hoesdoeve en weier 't volk vaan Mestreech.

Es ierste doen veer kaffee de Karkol in de Stokstraat aon. Aonkoms roontelum 20.00 oor.

Wat gebäört hei?

Alderiers weurt eus kemissie veur deen aovendleke striptoch oetgelag en um perceis oeterein te zette boe veer nao zeuke lègke twie aajd-Stadsprinse (eder in 11 minute) oet wie Mestreech (in gaodsnaom) aan hun gekoume is. Nao 11 minute weure ze aofgebeld, veer mote streng zien. Es daank weure de leedsjes vaan dees aajd-stadsprinse gespäöld. Daonao weurt aan d'n hospès 't oetloerkokeloer-aperaat oetgereik. E Mesjien boemèt d'n hospès zien klante kin bemoonstere um te zien of oonder zien gaste gesjikde kandidaote zitte veur 't hoegste amb in Mestreech. Nao e daankwoord vaan d'n hospès geit 't gezelsjap nao 't volgend adres boe de invölling perceis geliek is.

Veer zien um 21.00 oor bij kaffee Forum, um 22.00 oor bij kaffee In den Ouden Vogelstruys, um 23.00 oor bij kaffee Pieke Potloed en um 24.00 oor bij kaffee Hallo Mestreeg.

In kaffee de Karkol spreke **Henri d'n lerste** (2014) en **Bert d'n lerste** (1981)
Hun leedsjes zien: (2014)
Gekleurd op stap/ (1981)
Mestreech is eine groet kaffee.
In kaffee Forum spreke **Bary**

d'n lerste (1994) en **Luc d'n lerste** (2005)

Hun leedsjes zien: (1994) lech bin zoewie iech bin/ (2005) Laot de zon.

In kaffee In den Ouden Vogelstruys spreke **Han d'n lerste** (2012) en **Math d'n Twiede** (1987)

Hun leedsjes zien: (2012) Vendaog



höb iech geinen tied / (1987) Mèt blaore aan mien veuj.

In kaffee Pieke Potloed spreke **Michel d'n lerste** (1979) en **Tom d'n lerste** (1998)

Hun leedsjes zien: (1979) Straotkarneval / (1998) Mörgenvreug.

In kaffee Hallo Mestreeg spreke **Richard d'n lerste** (2008) en **Lou d'n Derde** (1988)

Hun leedsjes zien: (2008) Dao kump Maria/ (1988) lech bin geboore in Mestreech.

Op zoondagmiddag 26 jannewarie 2020 um 15.11 oor kint 'n eder op de Merret zien of euze striptoch door Mestreech 't riechteg rizzeltaot heet opgeliieverd. De kansellerijraod is devaan euvertuig tot de zjuste kandidaat gevoonde weurt en tot gans Mestreech opnui zal zinge tot ze zoe'ne gooje nog noets gehad höbbe.

Mooswiefpöpkes

Oondertösse alweer 2 jaor geleie zien de kleier vaan 't Mooswief vervaange door nui kleier. Veureg jaor höbbe veer in samewèrking mèt Athos Radar de aw stof verknip en verkoch in mini-stölpkes. Dat waor e groet succes en väöl lui höbbe 'n oonvervals stökske Mooswiefstof thoes!

Monique Lancee heet in Boscherveld 'n gans sjieke daagbesteiingsinstelling AZARO en is zelf vaan oersprunk kunstenares. AZARO beejt lui oet kwetsbaar gróppé de meugelekheid um (weer) deil te numme aan de maotsjappij. Monique waor al bezeg um 't Mooswief in 't klein te make, meh daan mèt eige stoffe. Wie veer es vereining De Tempeleers mèt Monique in kontak zien gekoume, höbbe veer nog e bitteke stof achtergehawwe en daomèt zien afgeloupe jaor 33 Mooswiefpöpkes gemaak mèt de echte origineel Mooswief-stof. Veer zien 'n aontal

kier bij Monique op bezoek ge-wees en 't waor ederskier geweldeg um de vorderinge te zien en welke lui welk onderdeil aan 't make waore vaan de pöpkes. 'n Ech samenwèrkingsprojek boeaon ederein zie steinsje (of eigeleken onderdeil) heet bijgedrage. Alle pöpkes höbbe daodoor hun eige "signatuur" gekrege.

Natuurlek is veur Zinen Hogen Hoeglöstegeheid Luc II ouch e speciaol pöpke gemaak dat is euverhandeg bij e bezeukske aan AZARO.

Veur de touwkoms goon veer zeker kieke wie veer weer mèt AZARO, meh ouch aander daagbesteiinge kinne samewerke um lui te verbinde en in 't zönneke of op e podium te zétte.

Veer wèlle vaanaof dees plaots AZARO bedaanke tot geer aofgeloupe jaor de Mooswief-pöpkes veur us höb gemaak!

– Benedict Persoon, PR-kemissie





Op zeuk nao nui Tempeleers

Zjus wie in eder vereining koume ouch bij de Tempeleers personeel mutaties veur. "De troepen" mote netuurlek wel op sterkde blieve um same mèt eus bôrgermètwèrkers de Mestreechter Vastelaovend te kinne organisere. Oscar Vandeberg is eine vaan de 'zeukkemissie' die moot zörge veur nuen aonwas vaan 't college der Tempeleers. Heer vertelt: "V'r welle doorstoete nao 33 en op langeren termijn mesjiens nao 44 Tempeleers".

'nen Tempeleer moet netuurlek hart höbbe veur Vastelaovend, de Mestreechter cultuur en sjariteit! H'r hoof neet in Mestreech gebore te zien, meh moot wel de Mestreechter Geis höbbe. Zeuke doen v'r daan ouch väöl in eus eige kontakte, want zeker bij eus bôrgermètwèrkers zitte die zake al mie es good! Eigenlek ligk de loep 't gans jaor op ederein in Mestreech.

Oet de vereining koume daan naome 'opborrele' vaan potentieel Tempeleers die ingedeild weure in roed-geel-en-greun kandidatoe: Es zoe iemes breid gedrage weurt, weurt zoe iemes 'ns beter beloerd of h'r in de club zouw passe. Es v'r intern daan e good geveul dreuver höbbe geit 't Presidium 'de vraog' stelle.

Es 't antwoord positief is, begint d'n trein te rije: rokkostuum en jas aonsjaffe en möts aonmete. Edere nuen Tempeleer krijg 2 mentore um de weeg te vinden in de vereining en um tössetijds te loere wie 't geit. Ouch weure kleskes gevölg boe-in de tradities, protocolle en historie weure mètgegeve en boe de nuie klaor gestoump weure um es volweerde Tempeleer te kinne actere.

De installatie gebäört traditietrouw op de jaorvergadering/ sezoensopening in november.

Dao weurt d'n eid aofgelag mèt de hand op 't maske. Daan begint e jaor vaan mètloupe en mojze bij alle kemissies um te loere boe iemes 't bëste op zien plaots is. In november 2020 mage v'r 3 nui Tempeleers installere: Bermon Pooters, John Albertz en Sjors Bonnemayer.

Meh boete de Tempeleers weurt e groet deil vaan 't werk verzat door zoegenaomde 'bôrgermètwèrkers'. Dit zien vrouwe en manne die same mèt 'de mötse' in 'n aontal kemissies alles roontelum de Vastelaovend organisere. Es geer uuch wèlt inzette veur de Vastelaovend, is dat mesjiens ouch get veur uuch! V'r zeuke o.a. lui die good zien in acquisitie, grafisch vörmgeve, lui die mètwèlle versere etc. Veur mie informatie, sjik e mailke nao info@tempeleers.nl.

John Albertz

Iech bin John Albertz. Iech bin Vastelaovendvierder in hart en nere, getrouwde mèt Jacqueline en gruutse pa van Floor en Christien. Veer woene achter de Sint Lambertuskèrk en iech wérk in 't Gouvernement. Iech bin gruuts tot iech touw maag trejje bij de Vastelaovendsvereining vaan Mestreech de Tempeleers es Tempeleer. Iech vin 't sjiek um de tradities vaan Vastelaovend in stand te kinne hawwe en liever in deze bezunderen tied gere'n bijdrage um 't plezeer en de chariteit vaan Vastelaovend mèt uuch oet te drage.



Sjors Bonnemayer

Iech bin Sjors Bonnemayer, 3x11 jaor, verloof mèt Evelien Verhoef en gruutse papa vaan 'n 3-jaorege dochter Lilianne. In 't daogeleks leve bin iech chèf "alles" bij Erik Stevens Catering in Eijsde. Nao 'n aontal jaor es bôrgermètwèrker bij de Tempeleersfamilie bij binne- en boetegebäore, bin iech gruuts tot iech maag touwtrejje tot 't colleesj vaan Tempeleers. Neet allein um de nostalgitche reie tot iech noe 3de ginneratie Tempeleer bin in mien familie, meh veural umtot iech miech geer wèlt inzette um de geweldige traditie vaan de Mestreechter Vastelaovend in stand te hawwe .



Bermon Pooters

Iech bin Bermon Pooters en bin gebore op Vastelaovendszoondag vaan 1979. Iech bin gruutse pap vaan Loek, Feline en Lowieck (+). Iech woen aan de Romanusweeg en bin eigeneer vaan Pooters Makelaardij en verantwoordelek veur de verheur-tak Pro Housing. Daoneve bin iech bestuurslid en mètopriechter vaan MOC, bestuurslid vaan de VVWM en lid vaan de Ron Taofel 179. Boete 't drök leve sport iech gere; op de fiets, renne en in de sportsjaol. Ouch bin iech gruutse bezeuker vaan eus MVV'ke en al 't sjoens wat Mestreech te beeje heet. Iech höb väölzin um same get te beteikenie veur de Mestreechter Vastelaovend.



De Tempeleers

situatie van 11 nov. 2019
tot 11 nov. 2020



Bastiaan Klomp
Presidium



Guy Bannier
Raodshier



Bert Beenkens
Raodshier



Iwan Bruijnzeels
PR / Kretserij



Jos Detisch
BoGe -cortège



Rob Dohmen
BiGe (tot juni 2020)



Maurice van Engelshoven
BoGe-cortège



Pol Feron
Direct. Maggezijn / ZHM Concur



Willy Fey
Raodshier



Marcel Franssen
Kretserij



Jos Gordijn
BiGe-Klevarezitting



Henri Janssen
BiGe/FiKe



Jan Janssen
KaRa-Momus avond



Henk de Jong
BiGe/Zeuten Inval



Frits Jongen
FiKe



Paul Joosten
PR



Nico Kempeners
Sikkertaris-Ginnteraal



Théon Kennis
FiKe/Habsjaardij



Wim Lousberg
Vice-President



Adrie Luijten
FiKe



Willy Massot
Raodshier († 12 miert 2020)



Benedict Persoon
PR



Guido Quaden
FiKe



Peter Regout
FiKe



Remy Rousseau
Sirmonomiester



Victor Salentijn
PR-ZHM Concur



Huub Stevens
BiGe / KTB / Marechal Funkeleer



Han van Trier
BoGe



Oscar Vandeberg
FiKe/KaRa



Odin Wijnhoven
KaRa/PR



John Zeguers
Subsidies



DAANK AON EUS BÖRGERMËTWERKERS

BOGE (Boetegebäöre)

- Remco Frederix
- Daniëlle Bollen
- Frans Jozef Janssen
- Jean Rossell
- Francois Pletsers

Maggezijn

- Nico Borgignons
- Harrie Crapels
- Ivo Crijns
- Pierre Dassen
- Pedro Dassen
- Michel van Geel
- Jan Hameleers
- Roger Hameleers
- Harie Hul
- Jean Lenaerts
- Giel van der Venne
- Jo Vlaspoel
- Charles Walthie
- Kim Willem

Klevarie

- Roger Niël
- Peter Stroes

Zeuten Inval

- Marion de Bont
- Loes Hermanns
- Guido Janssen
- Patrick Muijtjens
- Sjarel Ubachs

FIKE (Financieel kemissie)

- Elfie Bergmans
- Marion Willen
- Edwin Bruijnzeels
- Ton Schoenmaekers
- Imgriet Habets
- Armand Peereboom
- Emile Meuwissen
- Rob Hounjet
- Kim van Druenen
- Davy Pieters
- Rudy Ceulemans
- Gaston Schoonbrood

Soirée & Sósjetit

- Hennie Bastiaans
- Lou Brans Brabant
- Nicole Brans Brabant
- Corné Gilissen
- Pierre Gubbels
- René Persoon
- Luc Theunissen
- Georges van Zeijl

BIGE (Binnegebäöre)

Kinderkemissie

- Iris Castro
- Dónnee Garnier
- Marcel Spierts
- Vincent Vanderbroeck
- Susanne Muijtjens-Loontjens
- Roel van der Nat
- Mieke van der Nat-Kurris
- Charles de Jong
- Evan Geraeds
- Bert Machiels

KTB (Kemissie Techniek Boetegebäöre)

- Rick van der Aar
- Guido Baartscheer
- Ricky van Engelshoven
- Noël Fabry
- Thijs Hamaekers
- Annemie Haseleers
- John Haseleers
- Ton Hogenboom
- Wiel Jacobs
- Roel Janssen
- Rens Lasoe
- Chris van Wunnik
- Frank Verhees
- Roland Daems
- Jasmin Fischer

PR-kemissie

- Maurice Coenen
- Hans Hollanders
- Han Hoogma
- Armand Peereboom
- Carlo Schrijnemakers
- Stefan Gybels
- Hannah Gorissen (Stagiaire Social Media)
- Maud Collijn (Stagiaire Social Media)
- de geheim leie vaan 't Geheimsjrijverscollectief

Trèkkers

- Raymond Brands
- Ralph Caenen
- Hennie Coenen
- Guido v.d. Dijck
- Peter Gense
- Harrie Gulikers
- Maurice Kertzman
- Jack v.d. Meulen
- John Munnichs
- Hans v.d. Plas
- Francois Pletsers
- Ralph Schrijnemakers
- Peter Stroes
- Winnie Vrijens
- John Wagemans
- Marcel Zeegers
- Bert Habets
- Remy Frints
- Peter Hendrikx
- Servé Meerten
- W. Steijns
-

Kretserij

- Henk Franssen
- Jopie Franssen
- Armand Peereboom

KaRa (Kanselarijraod)

- Pierre Brinkhuizen (chauffeur böske)
- Jo Godding (chauffeur böske)

Besjermvrouw

Mevr. Annemarie Penn – te Strake
Börgemeister vaan Mestreech

Bestuur

- Bastiaan Klomp, Prizzedent
- Wim Lousberg, vice-Prizzedent
- Marcel Franssen, Kretser (tot 3 september 2020)
- Iwan Bruijnzeels, Kretser (vaanaof 3 september 2020)
- Théon Kennis, Habsjaar
- Han van Trier, vz. Boetegebäöre (tot juni 2020)
- Jos Detisch, vz. Boetegebäöre (vaanaof juni 2020)
- Rob Dohmen, vz. Binnegebäöre (tot juni 2020)
- Huub Stevens, vz. Binnegebäöre (vaanaof juni 2020)
- Guido Quaden, vz. Financieel Kemissie
- Odin Wijnhoven, vz. Kanselarijraod / Oetbelder
- Iwan Bruijnzeels, vz. P.R.-kemissie (tot 3 september 2020)

Iere-Tempeleer

Funs Wolfs

Zjubilei

HAN VAN TRIER

1x11 prinse gedeend

Perficia!

In Memoriam

Aofgeloupe jaor höbbe v'r ouch aofsjeid mote numme vaan lui die belangriek zien gewees veur de Tempeleersfamilie. Ze waore altied zier belangstellend bij de vereineging betrokke.
Veer winse familie en vrun hiel väöl sterkde touw.

V'r höbbe uuch in eus hart gesloten:

WILLY MASSOT

* 30 augustus 1936

† 12 miert 2020

Koelek 3 weke nao de Vastelaovend huurde veer 't dreuveg beriech tot Willie Massot waor gestorve. Mèt zienen doed verluis Mestreech 'ne verdeensteleke bôrger dee hiel väöl jaore Mestreech in alderlei functies vaan deens is gewees.

Zoe waor heer vaan zier naobij betrokke bij de realisatie vaan de tuinwiek Belfort, boevaan 't oontwerp en de realisatie in binne- en boete-land groete bekindheid kraoge.

Ouch waor heer jaorelaank es veurzitter actief binne 't Struyscomité. Ooonder zien patroenaasj greujde 't preuvenemint oet tot 'n stadsactiviteit mèt internationaal oetstraoling, boe doezendé lui vaan 't good leve in en van Mestreech kinne preuve.

Neet minder bekind en verdeenstek waor Willie Massot es lid vaan de Mestreechter Vastelaovendsvereineging de Tempeleers. Oonder d'n Tempeleersnaom 't "Sjäöfke" waor heer 42 jaor vaan kortbij betrokke bij de technische en bestuurlike zake vaan de Tempeleers. Mèt nao-me es "directeur" vaan 't Tempeleersmaggezijn en veurzitter vaan de kemmissie "Boetegebäöre" heet heer hiel väöl bijgedrage aan de oetstraoling vaan de Mestreechter Vastelaovend.

GUILL WIJNANDS

† 14 juli 2020

Vol oongelouf naome v'r kinnes vaan 't beriech tot euze chauffeur vaan de prinsegagel Guill Wijnands op de leeftied vaan 70 jaor gestorve is.

V'r höbbe Guill liere kinne in 't Vastelaovends-sezoen 2014 – 2015 wie heer de Tempeleers es chauffeur vaan 't böske veer weke laank nao alle oetheuk vaan Mestreech heet gebrach. 't Jaor daonao stapde Guill euver vaan 't böske nao de Prinsegagel en heet heer achtereinvolgens de Stadsprinse Jerome I, Rolam I, Armand I en Luc II es chauffeur vaan de Prinsegagel door Mestreech gerije. Bedaank veur alles wats diech veur de Tempeleers höbs beteikend.

VIP SEVEREIJNS

* 24-mei-1925

† 1-aprèl-2020

Wedevrouw hoesdouf vaan Jean Severijns (d'n Houtwörm)



Bedaank... volk vaan Mestreech!

MEH OUCH

Bedaanke veer eder jaor weer alle lui die mètgewerk höbbe aan dit verslaag, alle fotografie die 'n werm hart veur de Mestreechter Vastelaovend höbbe en invölling draon gegeve höbbe. En netuurlek bedaanke v'r Stadsprins Luc II veur zien invölling en beleving vaan zie Prinsejaor.

Vastelaovend vierste same, same mèt 't Volk vaan Mestreech, mèt alle vastelaovendvierders, mèt de hermeniekies, de kare, mèt respek aan beids kante en passend in dezen tied, mèt behaajd vaan tradities. Want de Vastelaovend zal altied blieve bestoorn, dao goon veur. Netuurlek zalle veer in dit sezoenbook get vergete zien en zien dao eveneminte neet of get wieneg beliech, meh ál besjrieve kós neet. Veer hope tot

geer toch 'ne sjoene kiek höb gekrege op 't afgeloupe jaor. Veer bedaanke veur hun mètwérking afgeloupe jaor:

- B & W en de Gemeinteraad vaan Mestreech
- d'n Deens Stadsbeheer en facilitair zake
- Brandweer, Pliesie, Ambulance en aander hòlpdeenste
- De peers
- Sappi
- Veldeke Krink Mestreech
- Alle Börgermètwérkers in de versjellende kemissies; zoonder hun kinne veer ech neet!
- Ederein dee door ziene/häöre financiële steun de rangatie vaan de Vastelaovend meugelek maakde

Meh veural uuch! 't Volk vaan Mestreech!

COLOFON

Oetgaof: Stiechting De Tempeleers, Posbös 2424, 6201 EA Mestreech

Samestèlling: Tempeleers Victor Salentijn en Iwan Bruijnzeels, Börgermètwérker Stefan Gybels Foto's: Jean-Pierre Geusens (Focuss 22), Laurens Bouvrie, Jeroen Drummen en Hans Hollanders

Oplaog: 350 stöks op pepier, daoneve digitaal via de website en social media
Vörmegeving: Youri Penders,
MoetMoet Dutch Letterpress
Drök: Cortjens, Druk met Communicatie

Pepier: **sappi**

Veer stoon weer aan de veuraovend vaan e nui sezoen, e sezoen dat gans aanders zal zien es de afgeloupe 75 jaor. Geine Stadsprins 2021, gein groete activiteite... Wat wel? Dat wèt noe nog geine, meh dat kint g'r leze in eus sezoenbook 2020/2021.



*‘ne Grande merci aan
‘t Vastelaovendvierend Volk
vaan Mestreech:*

“Bedaank, Bedaank, Bedaank!”

Op nao e bezunder vijfde sezoen...